

# Mariano Tschuor vegn clamà en la direcziun generala da la SRG SSR a Berna

■ (rtr) Sin proposta dal directur general Roger de Weck ha il cussegl d'administrasiun da la SRG SSR elegi ier Mariano Tschuor, directur RTR Radiotelevisiun Svizra Rumantscha, sco manader d'ina nova partiziun da stab cun competenzas schlargiadas. I sa tracta da la partiziun dals martgads (purschida da programs) e da la qualitat. Tschuor sutstatast directamain al directur general. El surpiglia la nova incumbensa a Berna l'october 2014.

Sco responsabel per la partiziun, ch'è vegnida structurada da nov e revalidada, è Mariano Tschuor responsabel per il management da qualitat da l'offerta publicistica da la SRG SSR, el responsescha ils programs naziunals e las coproduziuns e coordinescha il dossier promoziun da film.

Mariano Tschuor lavura dapi il 1982 per la SRG SSR. L'emprim sco redatur tar RTR a Cuir, s'enter ha el lavurà durant 13 onns en differentas funcziuns da program tar la Televisiun Svizra a Turitg, l'ultim sco manader da la redacziun per la cultura populara. Dapi il 2009 è Mariano Tschuor directur da RTR e commember dal comité directiv da la SRG SSR.



**Mariano Tschuor, il directur odiern da RTR.**

MAD

Vegnind dal program è el adina restà fidaivel ed attaschè a quel. S'enter ses return il 2003 tar RTR ha el accelerà sco schefredatur il project da convergenza. Plinavant ha Mariano Tschuor manà e realisà per la SRG SSR projects naziunals da program; uschia p. ex. Expo 02, emna d'integraziun e recentamain il mais tematic «Ils Svizzers».

Sco directur ha el renovà e transfurmà l'offerta da program da RTR sin ils trais vecturs radio, televisiun ed online ed ha preparà quels per il futur digital.

La SRG SSR Svizra Rumantscha engrazia a Mariano Tschuor per la direcziun eccellente ed exemplarica da RTR.

La suprastanza da la SRG.R gratulescha a Mariano Tschuor per sia nomina onurifica a Berna e sa legra che ses directur metta a disposiziun sia experientscha professiunala ed umana er en il futur a la SRG SSR.

Per la nova incumbensa en la centrala da la SRG SSR givaischa ella bler success.

La piazza da la directura/dal directur RTR vegn scritta ora publicamain. Oscar Knapp, president SRG.R